

Roman

'n **Roman** is 'n redelike lang, **fiktiewe** verhaal waarin 'n aantal episodes wat met mekaar verband hou, afspeel. Hierdie episodes word gewoonlik in hoofstukke verdeel. In die episodes word die karakter of karakters, en dit wat met hulle oor 'n bepaalde tydperk gebeur, weergegee met die fokus op hul denke en handeling. Die roman as literatuurvorm het waarskynlik sy oorsprong in die Middeleeuse Keltiese, Antieke en Bisantynse **sages** wat handel oor heldedade, ridderlike [liefde](#), trou, kuisheid en wonderbaarlike gebeure.



Soorte romans

Daar kan breedweg tussen die volgende soorte romans onderskei word:

- Avontuurromans waarin die hoofokus op die gebeure is (byvoorbeeld die ridderroman, robinsonade, reisroman, speurroman, western)
- **Psigologiese** romans waarin die hoofokus op die karakter se innerlike ontwikkeling en verandering is (byvoorbeeld die ontwikkelingsroman, Bildungsroman, opvoedingsroman)
- Tydsromans wat in 'n bepaalde tyd afspeel (byvoorbeeld sleutelroman, sosiale roman, sederoman, historiese roman, toekomsroman, **wetenskapsfiksie**, utopiese literatuur)
- Indien die klem in tydsromans ook op ruimte val, kan ook onderskei word tussen gotiese romans, streeksliteratuur, stadsroman en dorpsroman.
- Eksperimentele romans wat die tradisionele romanvorm bevraagteken en omverwerp deur verskillende tegniese eksperimente (byvoorbeeld die metaroman en bewussynstroomroman)

Benewens hierdie breë kategorieë, is daar ook die ek-, hy-, brief-, dagboek- en kroniekroman.



Kenmerke van 'n roman

Die [narratiewe elemente](#) karakter, tyd, ruimte, verteller, plot, tema, styl en [konflik](#) word in 'n geslaagde roman aangetref. Die karakters in 'n roman ervaar gewoonlik innerlike konflik (binne die karakter self) en uiterlike konflik (met ander karakters of die omgewing). Hoe meer waarskynlik die karakters en gebeure in 'n roman is, hoe groter is die kans dat die leser dit geloofwaardig sal vind. In 'n suksesvolle roman sal die leser dus met die fiktiewe karakters en gebeure kan identifiseer.



Die hoofkarakter word die protagonis genoem, terwyl die antagonis die hoofkarakter se teenstander is. Benewens hierdie twee soorte is daar ook newekarakters, soos die tritagonis, wat in die agtergrond figureer. Die belangrikste element van 'n goeie roman is 'n boeiende [storie](#). Daar kan meer as een storielyn in 'n roman wees. Hoofstorielyne bevat gewoonlik die belangrikste gebeure soos deur die hoofkarakter ervaar word, terwyl substorielyne gewoonlik oor minder belangrike gebeure handel soos deur minder belangrike karakters ervaar word.

Die gebeure in 'n roman speel altyd teen bepaalde agtergronde of **milieus** op spesifieke tye af. Dit is belangrik om te onthou dat die skrywer van die roman onderskei moet word van die verteller. Eersgenoemde is die persoon wat die roman geskryf het, terwyl laasgenoemde die storie vertel. Die verteller is meestal 'n eerstepersoonsverteller (of ek-verteller) of 'n derdepersoonsverteller.



Voorbeelde van romans

Die [Hertzogprys](#) word elke derde jaar aan 'n prosaskrywer wat werke van hoogstaande gehalte skryf, toegeken. Onlangse romans wat met hierdie prys bekroon is, sluit in *Agaat* (2004) deur Marlene van Niekerk, *30 nagte in Amsterdam* (2008) deur Etienne van Heerden, *Die aanspraak van lewende wesens* (2012) deur Ingrid Winterbach, *Buys* (2014) deur Willem Anker, en *Die derde spoel* (2017) deur S.J. Naudé. Ander bekende romanskrywers sluit in André P.

Brink, [P.G. du Plessis](#), [Elsa Joubert](#), Etienne Leroux, [Dalene Matthee](#), Deon Meyer, Francois Smith, Eben Venter en Bettina Wyngaard.



Die volgende voorbeeld is 'n uittreksel uit bekroonde skrywer Sophia Kapp se roman *Kanaän* (2020) en word hier met die vriendelike **vergunning** van die skrywer geplaas:

Die oomblik toe die jong man die vertrek binnetree, weet sy: Sy was reg om hom te laat kom.

Hy het geprotesteer natuurlik, met al sy gewone protestasies: Hy is besig, hy het verpligtinge, die sperdatum wat nou al hoeveel keer uitgestel is, is hierdie keer finaal vasgemaak en die uitgewer dring daarop aan dat hy dit móét nakom ... Maar sy ken hom al vandat hy 'n uur oud was en sy pa hom vir die eerste keer in haar arms neergelê het - hy kan nie vir haar lieg nie. Met sy mond, ja, maar nie met sy oë nie. En daarom weet sy onmiddellik: Hierdie mens is tot in sy siel toe uitgeput, met geen idee waar om weer vervulling vandaan te kry nie.

“Nonna Bella,” sê hy en kom buig oor haar stoel sodat hy haar op albei wange kan soengroet. Sy aanvaar dit met 'n glimlag, en laat hom toe om terug te tree sodat hy voor die venster kan gaan staan. Die afstand sal sy hom toelaat. Tot tyd en wyl.

“Dis mooi, nè?” sê sy. “Veral nou met die wingerd so groen ná al die reën.”

“Ja, dit bly besonders.” Hy draai om en pen haar met sy blik vas. “Het jy my die hele ent pad Sicilië toe laat kom om met my oor die uitsig te praat?”

Sy knik en antwoord gelykmatig: “Deels.”



Woordbank

fiktiewe	Dit wat slegs in die verbeelding bestaan.
vergunning	Toestemming.
psigologiese	Sielkundige.

wetenskapsfiksie	Storie in die literatuur of in 'n rolprent, gebaseer op verbeelde wetenskaplike ontwikkelings of omgewingsveranderings in/van die toekoms.
milieus	Omgewings.
sages	Oorlewering, verhaal.